



人

物

志

邕寧縣志卷三十七

垠西莫炳奎星五編纂

人物志一

自穆子有三不朽之訓。而虛聲之士。不得純盜於將來。此誠衡量人物之標準也。乃或者謂三代之士患好名。後世之士患不好名。謂好名則爲善必不真。不好名。則爲惡必無忌。似也。然而實至者名自歸。若道德不足以飭己。功業不足以立人。文章不足以經世。後之人將謂某也賢。某也不肖。則好名固不可。不好名又烏乎可哉。至若閨閣名媛。常則從一而終。變則貞操不貳。百折不磨之概。足以驚風雨而泣鬼神。其處境較男子爲尤難。采而錄之。以備史氏他日之採擇。志人物。

列傳目錄

列傳上

南漢

鍾允章

鍾有章

宋

石鑑

元 鄧祖勝 明 黃景信 鄧 洪 張 翱 陳 瑀 鄧 繼科 陳 瑾 劉 履吉 劉 福興 清 劉 章 曾 泰壙

顏 仲和 李 簡 李 藩 鄧 洪震 周 希正 徐 可行 蕭 雲舉 韋 賢

許 必可 曾 儲英

附王秀
黃道開

王 敏 鄧 璩 陳 琚 蔡 夔 蕭 棟 梁 雲昇 李 壽椿 馮 世俊 馮 贊勳

黃 安 熊 鑾 陳 大經 王 讓 杭 廷臣 郭 象儀 鄧 鑛 潘 德周 李 錦業

附弟大綸

李 沂

莫爾熾

唐咸仰

梁本檀

覃鶴雲
韋學易

杜壽明

李宜用

雷震瀛

謝煌

鍾德祥

梁松生

列傳下

雷志德

文萬選

班夢麟

謝岳生

覃杜榮

莫以瑩

黃國琦

壯烈

程炳南

蘇朝光

陳精一

馬英乾

盧寶德

劉永鈞

陸世元

舒曾謨

蔣德龍

秦玉麟

蘇元初

韋廷濟

陸永謙

黃國隆

謝光祖

黃景裕

雷濟廷

唐稱金

遷客

宋

張舜民

明

譚翼

流寓

明

徐宏祖

清

黎簡

藝術

王汝騏

楊四

拳術

吳德輔

仙釋

董傳策

華復蠡

胡一清

黎瑞綱

梁紹文

吳奎

莫之炳

曾亞才

晉

羅秀

宋

周師慶

明

宋真人

列傳上

(南漢)

鐘允章宣化人。徙居番禺。博學能文。南漢高祖劉龔時。設科取士。允章以進士及第。累遷中書舍人。尤以文字爲中宗晟所器重。凡誥勅碑記。及朝廷一切應撰文字。多使屬草。允章文思敏捷。詞藻絢爛。每撰進。無不稱旨。由是聲華藉甚。名聞諸國。嘗扈蹕羅山。應制爲蓬萊上界詩。援筆立就。中宗大褒賞。目爲倚馬才。又從幸英州盤龍石室歸。命撰雲華御室記。甚爲文士所稱。尋拜工部郎中知制誥。乾和中。使楚求婚。楚不許。時馬希廣新立。希萼起兵武陵。允章還報。中宗怒曰。馬氏復能經畧南土乎。對曰。馬氏兄弟相爭。亡於不暇。安能有餘力及我。因具言楚可取狀。勸中宗乘機圖之。中宗以爲然。遂決意用兵。遣巨象指揮使吳珣。西北招討使吳懷恩。將兵屯境上。伺間進取。

不數年。先後拔賀昭蒙桂宜連嚴富柳龔象柳等十二州之地。以允章首建議。恩遇愈隆。賞賜無算。頃之。以名儒傳東宮。後主銀嗣位。以允章先朝老臣。且推恩舊學。遷尚書右丞。參知政事。頗加禮遇。後主嘗遊羅浮黃龍洞。建天華宮。亦使爲記。允章雖以文亂結主知。然侃直不畏強禦。且性戇。不善作隱語。時後主淫戲無度。委政宦寺。內外事咸使裁決。女巫宮婢。朋比爲奸。朝政紊亂。允章素深嫉之。至是進位知政。職事皆爲所侵。不令參預機密。意益不平。乃抗疏請誅亂法數人。以振綱紀。後主不能從。羣小益側目。謀必致之死地。伺間卽發。會後主將祀園丘。前三日。允章率禮官登壇安置神位。偶四顧。有所指揮。內侍監許彥真望見之。呼曰。此殆謀反也。卽帶劍登壇。允章叱使下。彥真疾馳入宮。告允章將於郊祀日作亂。反形已露。請急治。後主曰。允章爲朕藩府舊僚。朕待之厚。豈忍背朕反耶。玉清宮使龔澄樞。內侍監李托等證之力。乃詔收允章。繫含章樓下。禮部尚書薛用丕。與羣閹窮按其獄。用丕與允章友善。心憐其冤。思爲平反。而宦官輩輒先雜治之。遂不能救。丕揣宦者意。知必不免。私以告允章。允章曰。老夫今日猶機上肉耳。分爲仇人所烹。但恨邕昌幼。不知吾冤。他日長。爲我語之。邕昌允章二子也。彥章聞之罵曰。欲使爾子報仇耶。旣治允章以酷刑。迫使誣服。復白復主曰。允章實與二子登壇。潛有所禱。後主遂並收二子族誅之。且暴允章屍。是日天色慘淡。日黯無光。聞者皆謂允章以忠鯁獲罪。相與歎息稱其冤。有泣下者。後數年。彥真伏誅。始收葬焉。南漢立國五十餘年。能以文字著者。惟允章一人。然蓬萊上界詩。與天華宮記皆不傳。傳者雲華御室一記。並絕詩一首。律句一聯而已。鍾有章。允章弟也。亦有文藻。與兄齊名。累官翰林學士中書舍人。後主銀初卽位。幸羅浮

山。建天華宮於其上。既命允章記之。又立雲華閣。及甘露羽蓋諸亭。命有章記之。亭閣極其宏麗。有章之文。亦詞采贍縟。雅與之稱。時稱爲大手著作。惜其文不傳。先允章卒。

（宋）

石鑑字大觀。邕州人。嘗舉進士。皇祐間。廣源州蠻儂智高叛。陷邕州。鑑親屬多爲賊殺。鑑逃奔桂州。智高攻廣州不下。還據邕州。秘書監余靖。受朝命討賊。鑑以書于靖。言邕三十六峒蠻。素受朝廷官爵恩賜。必不附智高。嚮者從賊東下。皆廣源州蠻。及中國亡命。不過數千人。其餘皆驅掠二廣之民也。今智高據邕。財力富強。必誘脅諸蠻。再圖進取。若使智高盡得三十六峒之兵。其爲中國患。未可量也。鑑素知諸峒山川人情。請以朝廷威德。說諭諸蠻酋長。使之不附智高。則孤立不足破矣。靖乃假鑑昭州軍事推官。問道說諸峒酋長。皆聽命。惟結峒酋長黃守陵最強。智高深與相結。洞中有良田甚廣。饒粳糯及魚。四面阻絕。惟一道可入。智高遣守陵書曰。吾向者長驅至廣州。所向皆捷。所以復還邕州者。欲撫存汝諸洞耳。中國名將如張忠蔣偕輩。皆望風授首。步兵易與不足憂。所未知者騎兵耳。今聞狄青以騎兵來。吾當試與之戰。若其克捷。吾長驅以取荆湖江南。以邕州授汝。不捷。則吾寓汝洞。休息士卒。從特磨洞借馬。教習騎射。候其可用。更圖後舉。必無敵矣。並厚以金珠遺守陵。守陵喜。運糯米以餉智高。鑑使人說守陵曰。智高乘州縣無備。橫行嶺南。今力盡勢窮。復還邕州。朝廷興大兵討之。敗在旦夕。汝世受國恩。何爲隨之以取族滅。且智高父存勗。本居廣源州。弟存祿。爲武勒州刺史。存勗襲殺存祿。而奪其地。又以女嫁廣源州刺史。因省其女。遂引兵襲

殺之。奪地如前。此皆汝耳目親見也。智高父子。貪詐無恩。譬如虎狼。不可親近。今汝乃欲延之洞中。吾見汝且爲虜矣。不可不爲備。守陵由是狐疑。稍疎智高。智高怒。遣兵襲之。守陵先爲備。逆戰大破之。會智高爲狄青所敗。遂不敢入結洞。而逃奔特磨。特磨西接大理。地多善馬。智高悉以所得二廣金帛子女。遺特磨蠻酋儂夏誠。又以其母妻夏誠弟夏卿。深相結納。夏誠許以兵馬借之。智高留其母及一弟一子。並其將。於夏誠所居之東十五里絲葦寨。而身詣大理。欲借兵共寇四川。使其母以特磨之兵寇廣南。請鑑詣特磨寨說夏誠。使圖智高。智高以兵守三絃水。鑑幾爲所獲。不得進而還。請鑑於靖曰。特磨距邕四十日程。智高恃其險遠。必不設備。鑑請不用中國尺兵斗糧。募諸洞壯丁往襲之。仍以重賂說特磨。使爲內應。取之必矣。靖許之。初智高反時。其母阿儂有計謀。智高攻陷城邑。多用其策。僭號皇太后。性慘毒。嗜小兒肉。每食必殺小兒。會聞阿儂在儂夏卿所。收殘衆。得三千餘人。習騎戰。復欲入寇。余靖遂督所部兵。發洞卒。及石鑑等。入特磨掩襲之。獲阿儂。及智高弟智光。子繼宗繼封。檻至京師。初未欲殺。日給飲食。欲以透出智高。或傳智高死。乃悉棄市。鑑以功授大理丞。累遷忠州刺史。尋知桂州。充本州經畧安撫使。後官至尙書

涑水紀聞 宋史
廣源州蠻傳

(元)

鄧祖勝邕州人。元末。以右丞守永州。聞楊璟師至。卽出迎敵。戰敗。斂兵固守。先是勝約全桂守將。率兵來援。皆先後敗潰。是時璟已取全州。畧定道州藍山桂陽武岡諸州縣。勝堅守永州。誓與城共存亡。璟乃分營諸門。築壘困之。又造浮橋於西江上濟軍。以急

攻勝。勝援絕食盡。或勸勝暫投他郡。以圖後效。勝慨然曰。吾受封疆之寄。保釐南邦。今不能禦難。以至此。何面目視息人間。當效死報國。忍偷生耶。璟督師攻之。知事不可爲。遂仰藥死。參續通鑑明紀

(明)

黃景信宣化人。洪武中掄才不拘資格。景信由監生蒞官。躬簿書。同敢暇逸。凡吏治民情。裁處允當。所至咸有令譽。官至山西右布政使。通志

顏仲和。宣化人。俊雅出群。才華超卓。洪武中。由監生蒞官。爲政多持大體。其著作尤見

重於諸名公卿。累官至浙江右布政使。府志

王敏。宣化人。監生。洪武中。擢御史。克振風紀。進交趾左參議。通志

黃安。宣化人。建文己卯舉人。永樂間。奉使交趾有功。陞交趾宣化府知府。赴部考績。爲

交道羣長吏第一。尋擢湖廣參政。交人復叛。安督餉道卒。通志

鄧洪。字光大。宣化人。倜儻不羈。童卯時。侍父彥智預鄉飲。縣尹見其容止俊雅。如老成人。舉爲邑弟子員。以英敏稱。初學宮在城北。科第湮鬱。洪白於督學使者。徙建城南

。正統戊午貢太學。及謁選吏部。以憂等拜南京山西道御史。廉謹自持。舉劾務存大體

。嘗命賚車鳳陽。人頌其公。旣而按直隸。威惠並行。逾年卒。內閣彭時銘其墓。通志

李簡。宣化人。景泰癸卯舉於鄉。少剛敏。任將樂令。三年。丁外艱。朝夕哀毀。旣葬廬墓服闋。補高明令。在任六年。民懷吏畏。爲上官所重。以考滿歸。遇宗族有爭者悉化之。祀高明名宦。通志

鄧璩宣化人。景泰丙子舉人。任浙江衢州同知。九載。矢冰檠。詰妍究。吏畏民懷。聲播遠近。擢雷州知府。通志

熊鑾字器之。宣化人。成化辛卯舉於鄉。持身端謹。任寧波府同知。恪守官箴。不激不隨。

奸慝盡戢。歸里後。鄉族奉為儀型。通志

張翱字鵬舉。宣化人。登成化庚子鄉舉。任龍門令。崇學校。闢田畝。士民孚洽。會逆瑾羅

織天下郡縣官。遣使至龍門。購藥索金。翱廉無與。有富民議貸出金者。翱堅拒之。遂

忤其意。解組歸。家居杜門。課子孫。及鄉子弟。多所成就。鄉人月旦推重焉。龍門志

稱其有守有為。不畏強禦。政平治簡。民咸德之。通志

李藩字建爵。宣化人。成化丙午登鄉薦。任分宜教授。遷廣東布政司經歷。改四川。純厚謹

潔。所歷俱有善績。子洙。字宗魯。嘉靖戊子舉於鄉。任惠安教諭。勤於教育。得士心

。擢萍鄉令。除蠹惠民。恬淡自守。人以為有父風。通志

陳琚字宗玉。宣化人。嘉靖四年。由貢生任廣東德慶州判官。時羅旁寇熾。流毒郡縣。琚提

偏師。相機剿撫。遂殲其渠魁。降服者為分什伍。定約束。俾與州人互市。冀其感化。

有嫉琚能者。陰為離間。寇衷甲如市。猝然變作。琚遂遇害。督府王守仁。擒寇魁趙本

戮之。以祭其墓。後祀鄉賢。通志

陳大經琚子。嘉靖中。以舉人令黔陽。蒞官嚴肅。勤政愛民。建學於龍標山。見沅州名宦志其弟大

綸。字伯言。嘉靖八年進士。十一年。知寧都縣事。咨詢民間利病。亟為興除。博者痛

繩以法。創立社學。命塾師教童子歌詩習禮。時行賞賚。風俗丕變。大綸善吟詠。及解

官歸。日與親故唱和為樂。稿多不傳。傳者惟永淳聚仙巖一絕云。參寧都直隸州志贛州府志聚仙巖詩云。此去邕州

兩日程。赤雲千里隔蓬城。漁歌一夜頃相聽。曲內分明怨不平。

陳瑀字伯玉。正德癸酉登賢書。任興國教諭。以節儉行慈惠。士有貧者。助以已俸。遷知永

春縣。永春夙稱巖邑。寇盜滋蔓。瑀捍禦有方。疆圉寧謐。吏部考天下清官居最。上聞

。擢長沙府判。歲飢。曲爲賑濟。民立湘水濼思碑以志德。升雲南五司提舉。界有舜塘

井。淡不成鹽。瑀至。取水煎之。復成鹽。近井民丁感其誠格。爲立生祠祀之府志

鄧洪震縣人。嘉靖進士。隆慶初爲兵部郎中。疏請減田租之半。俾蘇民困。帝嘉納之。後復

與周宏祖同上疏曰。入夏以來。霖雨彌月。又去冬京師地震。今春風霾大作。白日無光

。近大同又報雨雹傷物。地震有聲。陛下臨御甫半年。災異疊見。傳聞後宮游幸無時。

嬪御相隨。後車充斥。左右近習。濫叨賜予。政令屢易。前後背馳。邪正混淆。用舍猶

豫。萬一奸宄潛生。寇戎軼犯。其何以待之。帝復納其言。下禮官議修省。尋以疾歸。

萬曆改元。督撫交章論薦。竟不起參明史

蔡夔字彥章。宣化人。成化庚子舉人。授寧都令。決繁獄。釋冤民。毀淫祠。門絕私謁。卓

有清聲。以艱歸。吳廷舉餞之。贈之以詩曰。有扁旌仁政。無貲復故鄉。服闋。補知安

遠。清介如前。秋滿告歸。居鄉授徒。所造士登甲科甚衆。燕居獨處。衣冠嚴肅。里中

多倣之。通志

王讓通志作邵思讓

字伯禮。宣化人。貢太學。悃悞無華。睦宗族。崇行誼。任廣東番禺丞。弼成邑

政。能決累年未決之獄。縣令重之。撫按諸司。破格獎異。致仕歸。舉鄉飲大賓者二十

餘年。壽百歲。子儒、儻、儀、咸恪承庭訓。壽皆九十餘歲。一門德壽。鄉里羨之。榜

其居曰百歲第。通志

鄧繼科字瑩台。宣化人。嘉靖癸卯舉人。任廣東惠州司李。時海氛不靖。繼科有退賊功。擢雲南府司馬。致仕歸。素行端方。鄉黨欽重。當事者交相矜式。天啓間。督學魯請入祀

鄉賢。其子之梅之松。孫壽光。俱登賢書。通志

周希正。宣化人。嘉靖己酉舉人。任知縣。存心愛民。事上以直。以事多掣肘。拂袖歸。天

性恬淡。素行端嚴。後以郡人推舉。入祀鄉賢。通志

蕭棟縣人。嘉靖乙卯舉於鄉。任高要令。兼而能明。刑清政理。剏建縣城。興學造士。後以

憂去。士民泣送。謂高邑二百年來長吏。莫有能與蕭媲美者。其後補平江倅衡州。所至

以賢能著稱。廣東名宦志

杭廷臣字思亮。平南村人。隆慶庚午舉於鄉。累任提舉。所歷有聲。解組歸。不入公門。士

林式之。卒祀鄉賢。府志

陳瑾字白岳。縣垠邊村人。萬曆丙午舉人。天啓二年。知南康縣事。廉能明允。斷獄如神。

一切無名之徵。及健訟猾蠹。皆力除之。巽水故有隄。久決。瑾至親行履勘。加工復築

。至今不為災。在任七載。民乃大和。升海防同知。旋擢常德道副使。尋遷海關兵備使

。崇禎間致仕。於青山寺旁築精舍。名曰竹味齋。撰文為記。未幾卒。葬於逃軍山下之

掛金鐘嶺。江西通志族譜

徐可行字如心。宣化人。萬曆甲辰進士。歷戶部郎中。時邕舊例。糧入公帑者凡三項。民苦

繁耗。奏請編為一。又請免徵崩陷田糧。闔郡稱便。壬子主試河南。拔士八十人。皆名

流。卒祀鄉賢。通志

梁雲昇字超然。號靜穆。喬版村人。崇禎壬午舉於鄉。性忠勇奮發。慷慨多大節。南都破

時。永明王崎嶇嶺表。土寇蠶起。雲昇糾集義旅。入城保衛。闔邑賴安。旋永明襲爵桂王。議推戴。立爲帝。戊子二年。桂林兵變。移蹕南寧。雲昇率鄉兵入衛行畿。授內閣中書兵部車駕司。五年辛卯十二月。清帥線國安陷南寧。上倉皇出走。雲昇與戶部員外郎楊禹甸。率鄉兵護駕。至瀨灘。線國安以精兵追躡。塵掩皇輿。左右皆散失。王嫂桂恭王妃亦不能相顧而棄之。雲昇與禹甸親爲斷後。抵死力戰。護駕兵皆盡。遂同殉焉。上以是故得脫險。安抵安隆。雲昇力也。事後。鄉人感其忠義。立廟祠之曰雙忠廟。禹

甸溧陽人。

族譜府志明
季紀事補遺

郭象儀縣人。萬歷丙午舉人。任順慶府推官。殉難。贈光祿寺少卿。蔭子南寧衛千戶。

府志
按

象儀殉難。當有史略。惜
府志過簡。未能舉其辭。

劉履吉縣人。崇禎庚午鄉薦。戊子九月。陳邦傳遣子曾禹。統賓遷思明兵數千攻郡城。久不

下。縱兵擄掠村鄉。獲履吉。挾之去。履吉罵賊。與其妻並不屈死。

參府志

蕭雲舉字允升。澹村人。年十九。舉於鄉。登萬歷丙戌進士。選翰林。累遷禮部右侍郎。掌

翰林院事。教習庶吉士。擢吏部左侍郎。主庚戌會試。拔韓敬錢謙益等三百人。皆名流

。晉太子太保。掌詹事府事。禮部尚書。平生以氣節文章著。蔭子四人。卒贈太子太傅

。謚文端。諭祭葬。祀鄉賢。所著有青羅集行世。

通志

李壽椿縣人。崇禎丙子登賢書。庚寅冬。土寇李啞。屯聚劫掠。壽椿被擄入砦。既而知爲壽

椿也。釋其縛。敬禮之。欲授以事。不屈。爲賊幽死。

府志

鄧鑛字克柔。縣人。早孤。敦孝友。尚恬淡。母素多病。醫勿效。遂潛心醫術。既精。母乃

獲痊。或勸習舉業。鑛賦詩云。野人孰得野人趣。老大何曾解讀書。酌酒吟詩緣底事。耕田鑿井更何如。未因紫氣凌霄漢。自有春風到草廬。聖代於今又堯舜。脚跟隨處可樵漁。隱居半村。涉獵羣書。吟咏自適。與高人達士遊。所著有半村詩集。卒祀鄉賢。通志

劉福興劉村人。父導渺。明勅封都臺。福興生而雄勇。崇禎四年。投効軍營。隨南寧府知府從征某役。授外委。十六年。積功加授都指揮。永曆三年。陞總兵。十二年戊戌五月十六日。殉節於白楊河。年五十二。子廷珮。尋獲遺骨。安厝於鄉西之那置岡。其曾孫克昭。以雍正壬子副貢。任陽朔教諭。族譜

按族譜內所臚列各節。事多未確。概從刪節。又殉節白楊河。其事其地。編考各載籍。均未見。俟考。

韋賢葛麻嶺村人。狀貌魁偉。萬曆間。以諸生賜舉人。應宗室靖江王之召。妻以女。遂爲郡馬。官湖南衡州府同知。多惠政。秩滿回籍。因村後田。恆患水潦害稼。賢開闢金牛橋溝洫。俾得暢流。兼蓄蓄水量。以備不時灌溉。害去而利興。民至今賴之。

(清)

劉字章闇生。號了一。縣人。幼失怙。母賴氏矢志守節。育且教。登康熙癸卯鄉薦。痛不及事父。事母愈篤。饗飧必躬。爨具未嘗一日離間。母患篤疾。章號泣禱天。稽顙流血被面。母尋愈。或勸上公車。以母年老辭。後居喪。哀毀骨立。生平性氣嚴正。動心以禮。杜門嗜古。課子授徒。負笈其門者。多成名以去。年七十卒。子元清，德清。相繼登賢書府志

許必可字簡叔。縣人。康熙己酉舉人。知浙江壽昌縣。革耗羨。杜苞苴。卓有政聲。解組歸。宦橐蕭然。居鄉不事干謁。郡守孫調鼎。延爲義學師。陶淑有方。士獲造就。縣學久隳。必可清出舊址。請於當事。捐資復建。售手植山松。助其不敷。諸工藉竟。府志

馮世俊字智千。號退山。城區人。性聰穎。經史百家書。一讀輒能領悟。尤精周易。嘗謂易具四聖心傳。聖功王道。於是乎在。非僅卜筮書也。幼時父麟祥特鍾愛之。然未嘗恃愛而稍懈子職。家中事無鉅細。必躬與執役。其第三妹。守貞在閣。後世所稱爲貞姑者也。禮待如弟。至老不倦。年二十五。登雍正癸卯恩科賢書。乾隆丙寅。授福建永定縣知縣。以養民育才爲急務。勸民墾闢龍泉葛嶺大樟等處田地二百餘畝。儲穀長樂萬安二倉。以備荒歉。復捐廉購鰲峯書院所刻宋儒及閩前哲諸書五十餘種。以餉士子。戊辰三月。丁父憂去任。服滿。調補荆溪縣。不赴。旋主橫州某書院講席。及本郡蔚南書院講席。年八十一終於家。移柩墓橫州城外白象嶺。子紹堃。能世其學。

潘德周安吉團大塘村人。父御龍。爲浙江嚴衢鎮總兵。德周以監生應舉。領乾隆四十五年鄉薦。辛丑成進士。選翰林院庶吉士。初郡城內水道。原出故掩華門下。折而東。出黃大塘。屈曲流至東門墟。經長堙村前。合茆沙二江水。過垠東村。至白石咀。折而南流。十餘里。至竹排沖入河。紆緩停滯。每夏秋霖雨。城中蓄水。恆數月不得洩。居民苦之。德周乃相地勢。非改變水道不可。乃自九成橋。改掘水道。出觀音閣下。穿城根以達外。今世所謂陰溝口者是也。沿城根濠畔。至南門龍母廟右側。築一水口而入河。其勢直捷。自無蓄水之患。事當初議時。有言便者。有言不便者。德周曰。古人所謂民不可與慮始。可與樂成。此類是也。乃毅然爲之。城中積淤。始告清洩。自後遂無水患。民按

國六年城外水道仍復舊由
黃大塘流出詳建置水溝

曾泰壙字春麓。古城口村人有至性。品端學粹。嘉慶元年。舉孝廉方正。旋中戊午試鄉第二人。蒙古台布撫廣西。見其文。禮爲幕賓。五年。赴京覆試。欽賜六品服。後隨陝甘總督那彥成。剿白蓮教匪。參贊戎機。深見倚重。保知縣。留陝委用，旋署韓城縣知縣。民有女。初係指腹爲婚。壻長而家中落。女父悔。而女不願他適。壻知之。訟於官。歷任皆受女父賄。久不決。至是女父賄如初。泰壙集案牘。判女歸壻。並以所賄金授壻。訟解。邑人大懽。在韓一載。能得民心。惜民力。加惠士林。減耗羨。輕徭役。勤撫字。卓卓可紀。恩信大行。遷石泉縣知縣。地最瘠苦。泰壙處之裕如。其治一如治韓城時。爲大學士王杰所知。將薦擢大用。旋卒於任。至不能殮。石泉人捐貲賻之。歸其櫬。嚴如煜銘其墓。

曾儲英東門鄉垠東村人。嘉慶十五年舉於鄉。勇於爲義。不畏強禦。以派役徵伏。爲清代苛政。民不堪命。乾隆五十三年。總督孫士毅征安南一役。縣當兵衝。凡軍用輜重。悉征調民丁。爲長途輸送。負者肩穿。行者足繭。愁苦已不堪言。此在軍興時。猶可言也。自是以來。凡文武官員入境出境。甚至長隨幕賓。莫不濫派民夫。陸則隨塘運送。水則挽舟引繚。官不爲給錢。自裹餼糧。棄耒耜。犯寒暑。忍飢渴稍一不遂。則胥吏吆喝。鞭策如馬牛。往往斃杖下。爲閭閻害。已百餘年。嘉慶五年。儲英未第時。目擊其弊。激於公憤。挺身走省。控之大府。歷陳其害。不得直。則又赴粵垣。陳之總制。又不獲理。乃走京師。奔訴於都察院。始克由御史張鵬展。據情入奏。遂邀俞旨。永遠禁革。

自後派役。改爲雇役。其害始除。儲英力也。後又有王秀黃道開者。

王秀爲邑廩生。道開爲邑諸生。二生亦同慨憤派役之害。自曾儲英控京得直。自是官員入境出境。不敢如前濫派民伏。惟遇巡撫閱邊。學使按臨。地方官例應供差。而雇役之費。不入報銷。勢不得不仍舊派役。以資辦公。上官明知其弊。然體恤下僚。因循未改。二生乃毅然爲民請命。具辭控之大府。以違旨厲民爲言。巡撫孫玉庭始懼。八年。乃宣布革除。勒石驛站。所謂禁革各塘鋪伏役條款是也。由是南太各郡。始得甦息。則又得力於王秀道開二生爲多。王秀凌募村人。道開上黃村人。

按派役最爲厲民。入民國以來。不出於派。而出於拉。更爲厲害。其被拉者。又不分別何人。凡身軀粗壯者皆不免。故一聞拉夫。市皆閉肆。農皆輟耕。至今思之。猶爲心悸也。

馮贊勳字汝襄。號愚階。城區人。貢生大雅次子。前福建永定縣知縣世俊曾孫。性剛直好學。事親能以色養。幼貧甚。偕兄編鞭爆取傭值助家用。當操作時。口不輟讀。晨夕侍膳。恆以精飯奉父。己與兄則劃粥爲食。習以爲常。年十八。隨兄建勳應嘉慶癸酉科鄉試。同領鄉薦。庚辰會試成進士。選庶吉士。散館。授職編修。歷官御史。侃直敢言。恆疏陳天下利病。多見採納。尋奉命督學陝甘。及主考山西鄉試。遷太僕寺少卿。旋丁父憂歸。哀痛毀形。服滿。僑居廣州。主粵考粵華各書院講席。未幾卒於羊城。歸葬於里。生平文宗左史。字兼顏柳。晚年書法益勁。所著雙柱堂文集。及讀經隨見錄。未梓。燬於寇。

李錦業字心一。城區人。少穎悞。讀書一目數行。嘉慶癸酉於人鄉。道光壬辰成進士。尋授編修。著述甚富。多未梓。詩集亦散失。其留誦者。有搗衣辭從軍行等句。其搗衣辭

云。金風颯颯水茫茫。砧杵聲長恨更長。敲徹五更天未曉。白蘋洲外月如霜。年年空望大刀環。搗盡寒衣淚雨潛。可有西風憐怨苦。砧聲吹送玉門關。其從軍行云。連珠在手創橫腰。鐵甲金戈伴寂寥。滿憶家山纔入夢。朔風千里馬蕭蕭。琵琶慷慨有餘哀。九月霜高雁不來。莫道相忘砧杵冷。心緣烽火煉成灰。子汧能世其學。

李汧字蓉舫餘。錦葉子。道光己酉舉人。咸同間。以辦團功。賞藍翎。保知縣。分發雲南。委署彌勒縣知縣。有能名。五年不代。又以剿匪功。賞換花翎。遷霑益州。升沅江直隸州。尋擢曲靖府知府。大府將謀擢大用。旋丁母憂歸。卒於家。

縣學生莫爾熾。號南溪。東門鄉垠西村人。性任俠。重然諾。能急人難。清乾嘉間。縣徵收田賦。悉假諸牙儉市駟之手。設立機關。名曰卯鋪。巧立名目。恣爲姦虐。所輸倍於正供。且擅作威福。民間有欠勺合之米。累及全戶。相隨入獄瘦斃者。不知凡幾。蠹國病民。大爲地方之害。公不勝憤慨。思有以發之。約諸生梁本懿。武舉龔戴龍爲助。遠近聞之。爭加入者近萬人。遂具辭當道。歷陳其害。不得直。各卯鋪勢愈橫。民益憤。衆怒之下難抑止。於是搗毀卯鋪。欲得該惡役而甘心焉。事聞上官架以抗糧大題。嚴行逮捕。具案通詳。餘人皆逃散。公慨然曰。此事若不辨白。爾等皆亂民矣。遂就獄。提解上省。大府擬發配黑龍江。有幕僚某。視其牘。徐曰。黑龍江去廣西萬餘里。視某所爲。蓋激於義。爲民請命。非有他也。宜稍末減爲允。乃改配廣東。遞解回籍發放。遠近聞之。爭持牛酒來相歡慰。絡繹於塗。時母老妻壯子幼。離別可憐之色。愴然慷慨傷懷。泣數行下。已而寒日西傾。驪駒催促。遂灑然登檻車而去。時道光初年間事也。同治穆宗登極。赦回里。距去時將近四十年矣。回目樓臺非甲帳。去時冠劍是丁年。古今人有同慨也。其間悲懽離合。好事者至演爲傳奇云。公工吟詠。書學蘭亭帖。尤精妙。

在配所著有日記四卷。附以詩。未梓。毀於寇。後復德院試取進。更名矜。

唐咸仰字光甫。東門鄉官塘村人。道光己酉拔貢。選知縣。分發河南。爲政不尙刑戮。其署光州日。有布商趙姓者。被盜。請緝。旋獲王樹汝一名。訊之。則供業裝水煙。曾役於盜。而身非爲盜者。咸仰以證佐不實。未定讞姑繫之。趙乃上控唐生克。謂唐庇盜養奸。一夕檄至。令卽決。咸仰覆按如前。詳上。遂提王到省。發審委員。竟以重刑苦拷誣服。擬斬決。時屬吏有陸惺者。以大挑知縣。初到省候補。奉委爲監斬官。越日。押王赴市曹。道過州城隍廟。囚車驟忽奔入內。鞭之不出。王亦極口呼冤。陸睹此狀。命停刑。竟往臬轅述其異。臬司謂陸謬妄。故出人罪。痛斥之。仍命速行刑。復稟於李中丞鶴章。亦被痛斥如前。陸無如何。於是此事鬩動全城。適某御史因他事欽派到省。聞之。疑有冤。遂命緩刑。仍繫獄。據以入奏。有旨。令河督梅啓照覆訊。亦以事決無錯誤。如舊定擬。御史復以聞。得旨。命提京覆訊。旋真盜已由他縣緝獲。而王果冤。由是河督中丞以下皆罷黜。而咸仰得上旨嘉獎。以循吏稱。不數年。洊擢至臬司護理巡撫而陸亦擢至大吏。

參清野史
大觀

梁本檀字馥庵。心墟鄉堯頭村人。性和藹樸誠。守程朱學。與人無忤言。亦無忤色。登道光戊午科進士。授山東樂陵縣知縣。其審案。民事用和解。賊案求證據。刑訊雖設不用。時有兄弟爭產業。經數官。兩造俱行賄。案久不決。至是皆請託如前。拒却之。傳兩造到案。親爲勸解。譬引百端。皆堅執不從。本檀乃歎曰。更我又難了。（更讀姜去聲）此語爲邕平話普通語。邕寧自宋明以來。多係山東人佔籍。亦山東語也。兩造咸驚。縣令係廣西人。何以能道吾鄉音。相顧莞爾而笑。左右觀審者亦鬩然。遂遵判。事因立解。

。遂相傳爲趣事云。治樂陵三年。民用大和。秩滿報最。加同知銜。致仕歸。主蔚南書院講席。道德文章。爲鄉人所矜式。造益後進。多所成就。

覃鶴雲字彩林。五塘鄉金城驛人。桂林訓導覃霈子。道光末。以拔貢授訓導。未赴。適盜賊羣起。縣東北尤爲土匪窟穴。匪首李青天。僭號大王。欲禮致鶴雲。雲稱疾婉辭却之。青天大治第宅。衆爲詩歌獻諛。欲得鶴雲辭。鶴雲託以風痺得免。同治中。青天投誠。旋伏誅。凡黨於青天者。雖免誅。卒爲鄉黨所不齒。乃服鶴雲之高識。年六十卒。所爲詩文燼於火。同時不爲賊污者。有韋學易。學易六塘韋村人。弱冠補諸生弟子員。嘗練團禦匪。村破。青天亦欲羅攻之。學易避於武緣。依林墟團練以居。授徒自給。未幾卒於林墟。門弟子會葬至數百人。

杜壽朋原名熙繡。亭子堯頭嶺人。號黼廷。又號幼裳。年十三。應童子試。背誦十三經。不遺一字。爲文敏贍。學使池生春器之。贈以聯云。青眼我曾收二妙。黑頭君合到三公。蓋池按慶遠得馮生。皆隼才。故有此語。年十九。領鄉薦。計偕入都。留京三載。南歸。值洪楊起。巡撫勞崇光延爲幕賓。軍謀多所贊畫。與張忠武國梁最相契。旋以軍功保舉藍翎。儘先補用知縣。咸豐己未。復上京應春宮試。以第三人登進士第。選庶吉士。

改官授江蘇陽湖知縣。赴任日。值蘇常方陷賊。迫之降。不屈死。平生著作甚富。詩稿尤夥。多不存。其爲孫氏所拾。登之餘墨偶談者。寥寥數章而已。登繁臺云。上方鐘磬出林隈。落木

蕭蕭古吹臺。石磴天風鰲背立。高山秋色馬頭來。霜橫大野雁初下。菊過重陽花亂開。獨立蒼茫懷禹蹟。河聲莽莽向東迴。詩史吾家有杜陵。李河宗派繼傳燈。淵源異代開壇坫。今古人才幾斗升。九月蟹肥新酒熟。數畦花瘦晚煙凝。一年梁苑成羈旅。似此清遊得未曾。又詠蘇小墓云。歌舞南朝第一家。綺羅香裏門繁華。而今豔迹留芳草。那有流年管落花。癡蝶尚迷金縷曲。冷螢飛過玉鉤斜。陰陰松柏西冷道。何處重尋油碧車。歌臺舞榭久頽

傾。金粉當年畫不成。午夜有魂歸冷蝶。春風無主付啼鶯。湖山此
埭留詞客。風月甘心讓盛名。遺恨條條誰繫得。柳絲含雨過清明。

李宜用號獅山。三官堡花甲山后村人。道光甲午舉人。少聰敏。與弟宜植。主於其宗人李燮理家。就副貢秦天池受學。師事天池。父事燮理。偕天池赴省試。天池患巨瘡。纏綿床褥。獅山親爲傳藥。至便溺穢褻。皆自扶掖洗滌。其敬師如此。後主欽州鰲峯書院講席。循循善誘。多所成就。會洪楊革命軍起。廣西盜賊蠡起應之。土賊流寇日滋。爲害彌烈。官兵畏賊不敢前。民不聊生。宜用遂領銜代表大河上下各州縣。走京師。赴都察院陳請代奏。得旨。嚴令進兵。廣西官兵剿賊自此始。

雷震瀛字金門。東門鄉津頭村人。靈川訓導輝達子。同治壬戌舉人。勇於任事。不避勞怨。初縣徵收田賦。名目繁夥。每屆上下忙。悉田各卯鋪包攬徵收。小民輸納時。恣其魚肉。吆喝恐嚇。無所不用其極。大爲地方之害。前經莫爾熾發其姦貪。敗訴。氣勢愈橫。震瀛深悉其弊。至是陳於邑令黃玉桂。（事詳田賦內）轉詳藩司邀准。核定全縣糧賦總額。凡地丁兵米錢糧部飯。加一耗羨。二五耗羨等名目。融合爲一。總其名曰民米。每石以制錢四千二百文輸納。不得再加苛勒。邑人稱便。自後由縣戶科設法征收。卯鋪撤裁。於是歷年積弊。至是豁除。震瀛力也。光緒初。以大挑一等知縣。分發廣東。需次會城十九年。以不善逢迎上官。未獲補缺。僅獲羅定釐金差委一年。逾年歸里。主正誼書院講席。後十年卒。

謝煌字曉凡。城區人。副貢國楨子。博聞強記。才氣橫溢。爲文千言立就。典麗華贍。書法顏魯公。端整雄秀。咸豐十一年舉於鄉。桂撫劉中丞蔭藻聞其名。招入幕。奏疏告檄。皆出其手。議修省志。令主桂垣書局事。甚見器重。恒以臺閣期之。光緒二年北上。赴

禮部試。臨行贖以八百金。逾年成進士。殿試日。人咸擬以大魁。適是日陰雨。時未至而殿廷黑暗。卷未完被撤。以進士歸班用。未竟其才。人皆惜之。未幾卒於京師。在書局日。著有忠義錄羣盜錄平桂紀畧諸書。

蘇元初亭子鄉平南村人。道光中。舉於鄉。咸豐壬子八月初三日。吳村匪首梁日高等。率黨

攻平南村。元初督團練與賊搏戰。死焉。後入祀本邑昭忠祠。按此傳宜坳下壯烈

鍾德祥守西耘。斑峯團劉墟人。父金棟。縣學廩生。咸豐中。賊氛熾。金棟練團禦匪。反為

匪誣攀。被逮死獄中。因並圖害德祥。時德祥年十六。在郡應院試。方補縣學弟子員。甫

出場。匿於戚友家得免。乃奔桂林。時鄭小谷主講秀峯書院。因受學焉。親承教益。學

以大進。初遊湖南新城太守楊翰幕。甚見禮重。繼遊京師。受知於嘉定徐侍郎致祥最深

。恆以國士待之。同治三年舉於鄉。光緒二年成進士。選庶吉士。散館授編修。遷侍講

。甲申法越之變。奉命出關視師。幫辦廣西軍務。會和議撤兵。回京。拜江南道監察御

史。德祥性故抗直。既居言路。論列無所畏避。嘗上疏論大學士李鴻章。侃侃數千言。直

聲震海內而於蠹國。諸權貴彈劾尤力。時四川總督劉秉璋。貪黷酷虐。聲名狼藉。寵任

候補道徐春榮。試用道葉毓榮。提督錢玉興等為鷹犬。狼狽為奸。計苞苴所入。暮夜無知

者。不知凡幾。而其顯然可核者。六十餘萬兩。時慶邸當國。秉璋恃有奧援。氣勢薰灼。

無敢發者。德祥兼得其情。具疏以聞。其辭曰。為四川吏治蠹蝕污濁。懇請及時查辦督臣。以儆貪

全蜀富庶。久稱天府之國。得廉公忠潔之臣。出而撫綏。安全其民。則屹然為吾雄藩。魚肉而擾之。亦反覆以生亂。今督臣劉秉璋。治蜀最久。饜饜最甚。由其用人最私。是以侵牟百姓。最酷。臣若不舉發。恐未即有言之者矣。敢據所聞。列款糾參。恭候皇上宸斷。以行大德。一查劉秉璋。自巡撫江西時。即遇事敷衍。並無實心為民之政。江西士民甚薄之。然尚未以貪著也。及升任四川總督。信用候選道徐春榮。署提督錢玉興二人。托以心

腹。假之事權。賣弄招搖。收受薦賄。始猶迹涉疑似。久之則奔走徐春榮錢玉興之門。關說差委。絡繹如市。苞苴夜行。則牌扎晨得。貪聲流聞之初。當時兩司。亦有心知其不可者。曾向劉秉璋微言之。而劉秉璋猶飾詞支拒。其說以爲蜚語浮言。殊不可信。于是徐春榮錢玉興。並無所顧忌。人始知劉秉璋愛錢矣。徐春榮。邪佞猥賤。庸鄙已極。惟能窺伺劉秉璋。好諛喜佞。而貪賄之人。遂以居間受金之術自薦。劉秉璋大好之。乃認春榮爲乾女婿。而交益密。錢玉興係捻匪頭目。當初降時。以金帛數十鉅駝。投獻劉秉璋。因緣保至江西總兵。錢玉興以爲幣重酬薄。不滿慾望。要求不已。劉秉璋亦愧焉。及移川督。挾以俱來。不得不奏署提督。而聽其所爲。實亦各飽所欲。吏道因之穢濁。劉秉璋遂自以爲裕壑。並無將足自止之時。一查劉秉璋年來。凡題補委署文武員缺。傳聞多由徐春榮。錢玉興賄說而行。量缺議價。其應如嚮。省城有徐杏林堂。玉興錢店。包管開兌之謠。杏林者春榮別號也。如撤任富順縣。署成都縣。陳錫鬯之無端撤回本任。遂寧縣之越補黃允升。新都縣之越補余雲池。暨驟委署江津縣之錢少松。蜀中口語藉藉。確指爲徐杏林堂玉興錢店賄兌之驗。其先後所得贓銀。悉交與豐厚協同慶等銀號存記。此不能掩人耳目者也。鑽營之徒。既與徐春榮錢玉興狼狽爪牙以爲奸利。於是陳錫鬯、黃允欽、高培穀、費走寅、李玉宣、國璋等。或串廳奸商。夥開鹽井。籠取攬灶。計岸生理。或置買田產。濫刑苛斂。有五虎十三彪名目。惡聲狼籍。騰沸人口。劉秉璋何以亦毫無學察。此不得諉爲不知。一查四川官運鹽局。每年提存獲本銀六萬兩。十餘年來。計應存銀六十餘萬兩。該局委員。歷年比比皆陰融此項息銀。劉秉璋覺之。將按其事。局員窘急。盡將此銀六十餘萬。如數送交劉秉璋私橐。謂爲壽禮。查此項銀兩。本不報銷。是以局外無從稽核。劉秉璋受之。亦以爲暮夜無知之者。彼不料四川官吏知之。並京師知之。臣今竟揭之。則朝廷又知之。侵吞至六十萬數。非尋常貧酷之比。律以理法。豈復可原。至道員徐春榮。身爲督署。紳士葉毓榮。掌教成部。並無殊功。皆以馬邊雷波兩廳勦夷等案。濫保二品頂戴。則爲欺枉。葉毓榮係安徽人。劉秉璋以鄉里用之。至爲官員請托受賄。不數年間。積資以十萬計。則其縱容。諸如此類。殆難悉數矣。臣列參至此。或將疑其過于峭刻。然臣復聞之。四川州縣。所在設有羈禁。民人私卡。名目繁多。凡詞訟案件。未經審訊。悉先取卡刑拷勒索。至于瘦斃。不知其數。如陳錫鬯在富順縣八九年間。死于卡禁者。相傳至數千百命。黃允欽在遂寧縣。縱令子孫丁役。賣案索錢。當堂主斷。甚至誣良爲盜。號曰破案開花。此官吏之貪酷也。其各處防營弁勇。與游民約盟糾黨。勾結成風。暗通會匪。內憂方大。該匪近年竟敢倚官恃營。劫掠婦孺。悍然勒贖。一聞接童子抬觀音諸口號。莫不惶然失色。今年四月。至有營官之子。敢于省城糾匪殺人。官亦竟無過問。良懦震慄。不聊生。此營匪之橫暴也。尤爲甚者。成都府州縣屬。劫盜巨案層出。歲至數百。而官不知也。崇慶州城內。賊劫典舖。城外焚掠市鎮。新津縣賊衆。圍城至逾半月。而官不報也。三邊夷匪。蹂躪場鎮。圍攻寧遠。羽書告急。而大兵不起勦也。劉秉璋受皇上厚恩。爲川蜀重臣。若果昧滅天良至此。我皇上立飭法司行法。豈容倖免。顧臣嘗綜觀全史。其邊節重師。囊囊侵冒。及至貨賄如山。冤魂塞路。則大亂往往乘之而生。蓋其處心積慮。悉貪戾不平之氣。

。與禍患相乘。如劉秉璋者。即爲四川留遺患者也。然則刻剝酷虐。惟埋剽劫。侵軼賊害。四川百姓。今不堪命矣。總督臣將安逃罪。夫彈違糾慝。臣之職也。摘伏發奸。臣之志也。其敢於掎擊強權者。恃有聖明之斷也。是
否有當。伏乞皇上垂鑒。
訓示施行。謹奏。

疏上。上讀未竟。果大怒。命湖北巡撫譚繼詢。前往查辦。旋奉上諭。劉秉璋著革職留任。徐春榮葉毓榮錢玉興。卽行革職。永不叙用。其下降革有差。又內務府郎中某。侵而帑無算。德祥又上疏劾其侵欺。上又命窮治之。其他國家大政。天下利弊。凡有所以報國者。悉條陳上聞。每奏議出。都下傳誦。各報館爭先登載。宣布海內。人皆歎爲眞諫垣。然而奸人仄目。實由於此。思有以中傷之矣。然伺其失無所得。久之。奸人使人誘德祥僕飲博。貲罄則假之。謬爲慙懃。因問曰。聞爾主參某大吏。信有諸乎。曰否。參某吏方起草耳。參稿可竊出一視之乎。曰易耳。僕以感情故。不疑其有他。奸人既得稿。卽訐其事於朝。謂德祥藉參稿持以脅人以索賄。賍證悉具。廷臣愕然。按清稗史所載恣意誣詆卽此僕被逮。嚴鞫數四。終無一語及主人。而德祥竟以此褫職。戍軍臺。烏虜。奸臣設計工而毒。而德祥御下不謹。亦有以自取云。戍滿釋回。二十八年。廣西匪亂。兩廣總督岑春煊。奏調回郡辦理團防。又與左江道余誠格不合去。未幾卒於羊城。葬廣州北郭。德洋文宗昌黎。詩學少陵。所著蟄窠集。未梓。書初學顏太師。繼學歐陽率更而入其室。晚參漢隸。險勁奇宕。獨闢門戶。自成一家。

梁松生號茂亭。城區上郭街人。幼有大志。嘗業儒。咸豐中。海內多故。遂投筆從軍雲南。隨大軍剿杜文秀。以軍功超保守備。賞藍翎。嗣克復大理府蒙化廳趙州等處。擢廣西營游擊。賞換花翎。並以副將儘先補用。是役也。松生左脇受礮傷九處。不死。猶裹創血戰。卒奏大功。光緒乙酉。法越構兵。松生帶安邊各營赴前敵。戰功最著。遷廣南營參

將。加總兵銜。賜精勇巴圖魯勇號。旋奉檄委辦雲南土富州叛匪。分別首從。全活甚多。以積勞得疾。解任。光緒十三年丁亥十二月卒於滇岑襄勤公銘其墓。

邕寧縣志卷三十七終

